

Qalam

Bilangan 25 – Dzulkaedah – 1371 – Ogos 1952 - \$0.60

INSAFLAH!

Dalam keluaran kita menyebut haribulan yang lalu kita telah membayangkan kemerdekaan yang mana yang sebenar-benarnya dikehendaki oleh tiap-tiap seorang yang insaf kepada kedudukan dan keadaan diri seseorang yang menghendakki atas kemerdekaan itu. Sudah tentu bayangan itu akan harus menjadi suatu pernyataan orang-orang kita tentang cara mana yang patut kita hadapi pada hari ini menuju kepada cita-cita yang tersebut sudah kita membandingkan, mengukur dan memerhati tentang keadaan dan hal ehwal disekeliling kita hari ini iaitu setelah kita mengukur dengan ukuran yang sesuai dengan badan dan keadaan kita.

Jika kita perhati sekali imbas tentang corak-corak yang dikehendaki oleh setengah-setengah mereka yang mengemukakan dirinya sebagai penganjur kepada bangsa Melayu atau Malaya maka yang dapat kita ambil kesan daripada segala riuh rendah dan sorak sorai yang gegak gempita terdengar itu, kita hanya mendapati bahawa yang dibahas hanya menentukan pengisi-pengisi (orang-orang yang berhak di dalam kemerdekaan itu) sedang bagaimana corak dan bagaimana bentuk-bentuk tempat yang akan diisi itu tidak dibentangkan dihadapan kita iaitu adakah kemerdekaan itu bermakna menghapuskan hak-hak kita atau menjadikan kita didalamnya nanti hanya sebagai dif yang “enggan diterima ditolak tak dapat”.

Daripada diri kita sendiri kalau kita selidiki

dengan tenang dan saksama adalah kita nampaknya boleh jadi bercita-cita menghendakki suatu bentuk kemerdekaan yang rakyat akan berkuasa di dalamnya sebagaimana yang terbentuk di dalam Indonesia dengan nanti penganjur-penganjur yang berjuang bersama-sama di dalamnya akan memegang tumpuk pemerintahan dan kekuasaan di dalam negeri. Jika benar yang demikian ini tentulah akan ada pertanyaan adakah bentuk dan tanahnya di Semenanjung Tanah Melayu, dengan keadaan-keadaan di sekelilingnya boleh kita menyelenggarakan atau membuat sedemikian itu?

Sudah tentu pertanyaan yang sedemikian ini akan terjawab bahawa keadaan dan tanahnya berlainan walaupun ahli keturunan mereka itu satu. Perlainannya sudah terang dan nyata dihadapan mata kita. Cara yang berada di Indonesia itu tatkala mengambil kemerdekaannya daripada jajahan Belanda melihat keadaan-keadaan yang ada di sekeliling kita sudah tentu berlainan dan tak dapat dijalankan di sini, terutama kita tidak ada persatuan dan tidak ada boleh kata yang satu sedang disekeliling kita desakan-desakan yang sangat kuat daripada anak-anak dagang dan iktisad pertadbiran tersangat besar yang menjadikan kita nampaknya sehingga bernafas pun rasanya payah.

Dengan demikian maka segala cita-cita kemerdekaan yang kita hadapi, jika kita berkeras atasnya (dengan cara menjadikan nanti rakyat semata-mata yang berkuasa) harus tidak akan berjaya dan akan merugikan bahkan harus membinasakan kedudukan orang-orang Melayu.

Harus pembaca-pembaca akan bertanya apa cara yang kita buat. Banyak fikiran-fikiran yang siuman telah diberi kepada kita bahawa sekiranya kita mengikut telatah dan lunjuk serta desakan anak dagang yang nampaknya harus terpaksa disetujui, sama ada tepat atau tidak, alirannya oleh pihak pentadbiran itu akan tetap merugikan kita dan mengambil hak-hak kita dan dengan kerana itu tidak ada satu jalan yang lebih berfaedah selain daripada menegakkan perjanjian-perjanjian yang dibuat oleh raja-raja Melayu dengan kerajaan British yang sekarang sebahagian daripadanya

tergendala disebabkan oleh keadaan darurat yang sehingga dari satu ke suatu masa, jabatan-jabatan yang tertinggi di dalam tiap-tiap buah negeri-negeri Melayu itu puncanya sekarang diserahkan kepada pegawai-pegawai British pada hal dahulunya yang memegang tampuk-tampuk pemerintahan itu dari bangsa kita sendiri.

Kita mesti mahu faham bahawa yang diiktiraf berhak di dalam tiap-tiap buah negeri Melayu itu ialah raja-raja Melayu . Pada sisi undang-undang dan perjanjian-perjanjian semenjak daripada Perjanjian Pangkor hingga kepada Perjanjian Persekutuan Tanah Melayu raja-raja Melayu itulah yang membuat perjanjian, bukannya wakil kita – yakni wakil-wakil yang dipilih oleh orang-orang Melayu sendiri – yang terdiri daripada rakyat jelata. Dengan kerana itu sekiranya sultan-sultan itu hendak menjual negerinya maka ia berhak melakukan yang demikian, dan kita kerana tidak mempunyai persatuan yang kuat serta kerjasama yang rapat dengan raja-raja itu sudah tentu kita hanya melumur telujuk dan kita hanya bertukar tuan sahaja dengan tidak mendapat suatu pun daripada kita.

Umpamanya, jika sekiranya ditawarkan oleh pihak kerajaan British sebanyak seratus milion pound kepada Duli Yang Maha Mulia Sultan Johor, lima puluh milion pound kepada Putra Mahkota dan lima puluh milion pound kepada kerabat-kerabat di raja dengan membuat sehelai surat perjanjian menyerahkan tanah Johor yang kaya raya itu yang penuh dengan berbagai-bagi logam yang diidam-idamkan oleh semua bangsa di dalam dunia ini maka adakah kita akan berhak boleh menahannya? Sudah tentu sehelai surat perjanjian itu akan diterima dan diakui oleh sebab Sultan itulah yang diiktiraf berhak di dalam negeri itu.

Dengan keadaan-keadaan yang demikian ini adalah menjadikan kita patut berfikir dengan tenang dan sabar serta cermat iaitu adakah kita hanya mengikut hala-hala yang dihalakan untuk kita supaya fikiran, perasaan dan hati kita terpisah daripada sultan-sultan kita? Adakah yang demikian itu bermanfaat kepada kita pada hal disekeliling kita anak-anak dagang dari semasa ke semasa menguatkan

cengkaman ke leher kita?

Dengan sebab itu ada banyak fikiran-fikiran yang timbul yang menghendakki bahawa hala perjuangan kita kepada tujuan kemerdekaaan itu ialah kita mesti bekerja menegakkan hak-hak tiap-tiap sebuah negeri dengan hak raja-rajanya masing-masing – dengan menjauhkan sama sekali hala tujuan menyatukan atas satu pemerhatian pada hal di sana, dengan ketiadaan sempurna kita akan membinasakan kehidupan dan kedudukan kita pada masa yang akan datang.

Dengan menegakkan hak-hak Duli Yang Maha Mulia-Mulia Sultan itu maka sudah tentu jalannya ialah menunjukkan kerjasama dengan pertadbitan kerajaan British di Malaya dengan cara kerjasama yang tepat oleh sebab sekiranya kita tidak mendampingkan diri kepadanya, dengan keadaan-keadaan kita sekarang, sudah tentu sekiranya terjadi sesuatu hal yang nampaknya sentiasa ada di pintu kita, kita akan binasa dan harus tidak akan bangkit untuk selama-lamanya.

Mudah-mudahan dengan perasaan yang tenang, penganjur kita yang diharap, akan memerhati dan mahu merapatkan kerjasama di antara umat Melayu dengan rajanya, dengan tertanam semangat “raja itu rakyat – rakyat itu raja” sebagaimana yang dilafazkan oleh Al-Marhum Sultan Abdul Azizi dahulu, bermohonlah kita kepada Allah supaya memberi hidayah dan taufik kepada kita.

Sudah Terbit!

Pesan Sekarang!

(PUTERI SEPANYOL)

atau (Thariq bin Ziyad)

Tarikh Islam melangkah ke Spain – digambarkan Di dalam suatu cerita yang menarik – karangan Jirji Zaydan – dimelayukan oleh Abdullah Basmeh – dua penggal tamat senaskhah \$1.20 pos 10 sen.